



榕樹

學校有一列教室，頭前種一排榕樹，雖然無幾大叢，毋過，熱天時做得抵涼、冷天時做得抵風，三不二時還會傳來學生仔搞寮个笑聲，盡受師生歡迎。偈逐擺企在操場脣，看等該一大片(pienˋ)浸青，心情就鬆爽起來，年年指望做得分配到該列教室，享受臥頭窗門外有藍天綠樹、低頭教室肚有朗朗書聲个教書生活。

有一擺放隻長假轉來，看著該排榕樹，目汁強強會流出來，就為著落葉膠樹子難掃，榕樹分人鏢到像光頭樣。伸著幾枝樹桠指向天空，就像一雙雙手膠上天控訴樣，無奈又淒慘。毋單淨偈試著痛心，學校也接著盡多抗議个電話，怪怨學校做法毋著。尤其係一群校友，有兜講榕樹係佢頭擺種个，像自家个細人仔樣；有兜講榕樹下係佢頭擺遊戲个場所，有佢歡樂个回憶，這下，幾刀斬落去，斬斷佢兜對母校个思戀。無想著幾頭榕樹，帶分人恁深刻个感受。

原來，榕樹留下盡多人个童年，偈乜共樣。榕樹係偈最先認識个樹仔，從細就在佢身邊捩上捩下，在佢砸砸个膻身脣搞园人尋、在佢像遮仔樣个樹下搞份家啦、還當好在佢像鬍鬚樣个細根項鑽上鑽下，緊搞緊笑。細佬仔就在樹下彈圓子、打劈子，搞到頭烏面暗。大人坐在交椅頂，一頭搖旗扇，一頭啄目睡。這種場景，到這下還真真浮現在偈个眼前。

到較大兜，就換在伯公下出出入入，伯公下孤孤栖栖企在坎頂，後背係一大片青里里个農田，脣頭就係一叢鋪天蓋地个大榕樹，位置偏僻，恬靜又涼爽。幾個好朋友湊等就在樹下講心事、看小說、唱歌仔，風在樹尾颼颼滾吹，圳水在坎下啍啍滾流，偈兜呢呢嚶嚶个聲音，跔等風聲、水聲流轉，幾好个年少歲月啊！

幾下十年過去咧，偈人生中重要个大榕樹，因為增建教室、拓寬馬路、新起大屋，大體無在咧，伸著伯公下个榕樹本本企在該，毋過跔等時代，早就少忒頭擺个僻靜。倒轉來看看自家，乜早就少忒當年个童心膠開心。

作者：張美容

☆詞彙學習☆

【抵涼】di' liong：遮蔭、乘涼。

【劈子】piag zii'：圓形紙牌。

【鏢】dunˋ：裁切、截斷。

【膻身】vu shinˋ：身體。

【圓子】rhan zii'：彈珠。

【真真】zhinˋ zhinˋ：清清楚楚

☆文法學習☆

【颼颼滾】siu siu gunˊ：形容風聲。客家語的象聲詞常以「AA 滾」的形式出現，閩南語則以「AA 叫」的方式呈現。「滾」表示正在發出這種聲音，可增加文意的動態感。如：噉噉滾(ve ve gunˊ)、嘩嘩滾(bi bi gunˊ)、叭叭滾(ba ba gunˊ)、呱呱滾(gua gua gunˊ)、鈴鈴滾(liang liang gunˊ)。